



5. marts 2010

UPA 2010/68

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiupparput:

Silaannaap kissatsikkiartorneranut atatillugu nunalerinermik inuussutissarsiuteqartut ajornartorsiutigiligaasa, soorlu panernersuaqartalernerata kingunerisaanik immikkut ittumik ataavartumillu iliuuseqartoqarnissaa/nunalerinermut pilersaarusiortoqarnissaa siunertaralugu suliamut ilisimasalinnik siunnersuisussatut suleqatigiissitaliortoqarnissaa Naalakkersuisut peqquneqarnissaannik Inatsisartut aalajangiiffigisassaattut siunnersuut (ATASSUT-ip Inatsisartunut ilaasortaataitai: Finn Karlsen, Siverth K. Heilmann, Knud Kristiansen)

Tunggavilersuut:

Silaannaap kissakkiartorneranut atatillugu Kalaallit Nunaanni nunalerinermik inuussutissarsiuteqartunut kingunipiluit ilagaat narsaatnik ingerlatsivinni panernersuartut ittumik nalaataqartoqartalenera.

Pissutsit nutaat atuuttut malitsigisaannik savaatillit namminneq naatitaminnik nerukkaatissanik naammattunik naatitsinnaanerit killeqaleraluttuinnarpoq. Tamatuma kingunerisaanik nerukkaatissanik nunani allaneersunik savaatillit aningaasartuutiginerulikkaminnik pissarsiniartariaqarnerat annertusisussaassaaq. Tassunga tunggatillugu nerukkaatissat avataaniit tikisitat pitsaassutsimikkut nerukkaatissanut nutaanut namminerlu naatitanut sanilliullugit pitsaassutsimikkut appasinnerupput atorneqarnerulerneratigullu neqit pitsaassusaannut appartitsisussaassallutik. Taamatuttaaq savat savaaqqallu neqaannik nunatsinnit nerukkaatissianik nerisaqarnermikkut pitsaassusaat tunggavigalugu tunisassiorneq avammullu nioqqutissiorniarneq ilanngullugu innarlerneqartussaassaaq.

Naak massa inatsisit atuuttut savaatilinnut tapernerneqarnissamik aammalu taarsigassarsiniarnissamik periarfissiilluaraluartut, ATASSUT-mit isumaqarpugut piaartumik immikkut ittumik iliuuseqartoqartariaqartoq, silaannammi kissatsikkiartorneranut atatillugu nunalerinermik ingerlataqartut ajornartorsiutinik annertuunik aammalu sillimaffigisimanniganik naammattoorsisalereermata.

Assersuutigiinnarlugu pisariaqarpoq sialoqanginnerujussuata kingunerisaanik nunaatit imerterneqarnissaannut pisariaqartitsinerup qulaajaavigineqarnissaa. Taamatuttaaq kingunissaasut allat suussagaluarnersut pillugit nalilersuisoqartariaqarpoq, soorlu sillimaffigineqartariaqartut

ilagaat nunap savat neriniarfigisartagaat sialuup amigaataanerata kingunerisaanik annikilleriarsinnaanera eqqarsaatigalugu.

Qularnanngilaq ajornartorsiummut tunngatillugu immikkut eqqumaffigineqartariaqartut iliuuseqarfigineqartariaqartullu suli arlaqassasut, soorlu aamma ilimanarsinnaasoq taarsigassarsiniartarnermut tapiissutinillu pissarsisarnermut tunngaviusut allanngortinneqartariaqarsinnaasut. Taamaammat pingaaruteqarpoq pisariaqarlunilu suliassa qarfiup iluani immikkut ittumik iliuuseqartoqarnissaa.

Takorloorparput Naalakkersuisut alloriarnerat siulleq tassaasariaqartoq silaannaap allanngornerata kingunerisai kingunerisinnaasaalu pillugit nunalerinermik suliaqartut peqatigalugit qulaajaasitsinissaq. Qulaajaasitsinermi tassani silaannaap allanngornerata kinguneri ullumikkut atuuttut siunissamilu atuutilersinnaasut ilanngullugit sunaassusersiniarneqassapput. Qulaajaasitsinerlu naammassippat tamanna tunngavigalugu Naalakkersuisut Inatsisartunut siunnersuummik saqqummiussissapput tassani aamma ilanngullugu aningaasatigut kingunissaasut pillugit siunnersuuteqartoqarnissaa kissaatiginarluni.

Taamatut tunngavilersuuteqarluta siunnersuut Inatsisartunut suliassanngortipparput.